

## **Inatsisissatut siunnersuummut oqaaseqaatit**

### *Oqaaseqaatit nalinginnaasut*

#### **1. Aallaqqaasiut**

##### *1.1 Siunnersuummut pingaarnertut tunuliaqut*

Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq 1. august 2012-imi atuutilerpoq.

Tamassuma kingorna paasinarsivoq ilinniarnertuunngorniartarneq ilinniartitsissutinik ataasiakkaanik ilinniartitsinermik neqerooruteqartarneq aamma ilinniagaqalernissamut piareersarnerluni pikkorissarnernik pilersitsisarneq pillugit inatsimmi naammattumik pisinnaatitsisoqarnerneq nalornissutigineqartoq.

Aammattaaq paasinarsivoq ilinniartitsinermi suliamik ingerlatsinermi piginnaasat pillugit malittarisassiornissamut pisinnaatitsissummi aamma suliamik ingerlatsinermi piumasqaatit minnerpaaffissaat pillugit malittarisassiortarneq pineqarsinnaanersoq nalornissutigineqartoq.

##### *1.2 Inatsimmik piareersaanermi pingaarnertut*

Pisinnaatitsilluni aalajangersakkat ilaasa erseqqissarnissaat taamaallaat pineqarmat, inatsisissap piareersarlugu suliarinerani avataaneersunik peqataatitsinissaq pisariaqarsimanngilaq.

#### **2. Siunnersuummi immikkoortut pingaarnertut**

Ilinniartitsissutini ataasiakkaani ilinniartitsinermik neqerooruteqartarnissamut aamma ilinniagaqalernissamut piareersarluni pikkorissarnerni pilersitsisarnissanut piginnaatitsissummik siunnersuut imaqarpoq.

Ilinniartitsinermi suliamik ingerlatsinermi piginnaasat pillugit malittarisassiornissamut maannakkut piginnaatitsissut siunnersuummi aamma erseqqissarneqarpoq, taamaalilluni tassani suliamik ingerlatsinermut minnerpaamik piumasqaatinik aalajangersaanissaq erseqqarissumik ilanngunneqarluni.

##### *2.1 Ilinniartitsissutinik ataasiakkaanik ilinniartitsinissamik neqeroorutit*

Ilinniarnertuunngorniartarneq ilinniartitsissutinik ataasiakkaanik ilinniartitsisarneq ilinniarnertuunngorniartarneq pillugu Inatsisartut inatsisaata nr. 13, 22. november 2011-meersup atuutilernissaata tungaanut Kalaallit Nunaanni Ilinniarnertuunngorniartarneq pillugit Namminersornerullutik Oqartussat nalunaarutaatigut nr. 21, 5. august 1992-imeersukkut Kalaallit Nunaanni Ilinniarnertuunngorniartarneq pillugit nalunaarutip allanngortinneqarneranik

Namminersornerullutik Oqartussat nalunaarutaatigut nr. 28, 27. juni 1994-imeersukkut allanngortinneqartukkut malittarisassaqtinneqarpoq.

Nalunaarummi ilinniarfiit ataasiakkaat, ilinniarnertuunngorniarnermik (GU) neqerooruteqartut, atuarfeqarfimminni ilinniartitsissutinik ataasiakkaanik ilinniartitsinernik pilersitsisinnaanerat ilaatigut aalajangersarneqarpoq. Aammattaaq nalunaarummi aalajangersarneqarpoq ilinniarnertuunngorniarnarfinni ilinniartitsissutit aalajangersimasut neqeroorutiginnisaat pillugu piumasaaqateqartoqanngitsoq, anguniarneqassasorli ilinniarnertuunngorniarnarfinni tamakkiisumik soraarummeernissamut katiterinnissamut pikkorissartut periarfissaqassasut.

Ilinniarnertuunngorniarnarfeq pillugu Inatsisartut inatsisaat ilinniagaqalernissamut piareersarluni ilinniartitsissutini ataasiakkaani ilinniartitsinernik neqerooruteqarnissamik pisinnaatitsissummik ersarissumik imeqanngilaq. Inatsimmi § 46, imm. 2-mi aalajangersarneqarpoq ilinniartitsissutini pinngitsoorani ilinniarnertuunngorniarnarfeq tamani misilitsinnermi karakterit, ilinniartitsissutit toqqarneqarsinnaasut naammattumik amerlassusillit ilinniarnermilu suliaasat nammineerluni suliarneqartussat katiterlugit ilinniartitsissutini ataasiakkaani soraarummeerluni ilinniarnertuutut soraarummeertoqarsinnaasoq, tamannalu pillugu Naalakkersuisut malittarisassiorsinnaasut.

Inatsimmi § 72, imm. 7-imi aammattaaq aalajangersarneqarpoq Naalakkersuisut malittarisassiorsinnaasut pisuni suni ilinniartut ilinniartitsissutinik ataasiakkaanik ilinniartitsinernik ilinniartut malinnaavigissaneraat, ilinniartitsinermi peqataanernut misilitsinnernullu akiliuteqartoqartassanersoq ilinniartullu ilinniartitsinermut peqataanissamut nalunaarnatik misilitsinnissamut nalunaartut (imminnut ilinniartittut) misilitsinnissamut akiliuteqartassanersut.

Taamaalilluni inatsisip akuersissutigineqarnerani naatsorsuutigineqarpoq ilinniagaqalernissamut piareersarluni ilinniartitsissutini ataasiakkaani ilinniartitsinernik suliaq neqerooruteqartoqarsinnaasassasoq, kisiannili tamassumunnga aalajangersimasumik erseqqarissumillu pisinnaatitsisoqarani, tassunga ilanngullugu tamanna pillugu annertunerusunik malittarisassiorsinnaaneq. Piginnaatitsissut siunnersuummi ilanngunniarneqarpoq.

## *2.2 Ilinniagaqalernissamut piareersarluni pikkorissarnernik pilersitsineq*

Ilinniagaqalernissamut piareersarluni pikkorissarnernik pilersitsinissamut immikkut pisinnaatitsissummik inatsit imaqqanngilaq. Inatsimmi § 1, imm. 3 imaqqaraluarpoq tamanna pillugu malittarisassat aalajangersarneqarnikut malillugit Kalaallit Nunaanni Danmarkimilu sivikitsumik akunnattumillu siviussusilimmik ilinniarnermik aallartitsissutaasinnaasunik ilinniarnertuunngorniarnarfeq immikkut ilinniarnissat pillugit Naalakkersuisut malittarisassiorsinnaasut. Kisiannili ilimagineqarpoq pisinnaatitsissut tamanna ilinniagaqalernissamut piareersarluni pikkorissarnernik ilinniarnertuunngorniarnarfeq ilinniarnivittut isigineqarsinaanngitsunik pilersitsinissamut pisinnaatitsissutaanngitsoq.

Ilinniagaqalernissamut piareersarluni pikkorissarnerit Nuummi ilinniarnertuunngorniarfimmi 2005-imiit Aasiannilu ilinniarnertuunngorniarfimmi 2008-imiit misileraalluni ingerlanneqarnikuupput. Pikkorissarnerit assigiinnngitsunik taaguuserlugit ilisimaneqarput, tassunga ilanngullugit ”Ukioq ataaseq imersimasunut GU, ”Aallarnisaalluni ilinniarneq” aamma ”Ilinniarnermik aallartitsinissamut ukioq ataaseq pikkorissarneq”.

Pikkorissarnernut Kalaallit Ilinniarnertuunngorniarneq aamma ilinniagaqalernissamut piareersarluni ilinniartitsissutini ataasiakkaani ilinniartitsisarneq pillugit nalunaarummi nr. 748, 29. juni 2006-imeersumi (GU pillugu nalunaarut) maannamut pisinnaatitsisoqarnikuuvoq. Kisiannili pisinnaatitsineq tamanna ilinniarnertuunngorniarneq pillugu Inatsisartut inatsisaata nr. 13, 22. november 2011-meersup atuutilersinneqarnerani atorunnaarpoq.

Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoqarfik august/september 2013-imi pikkorissarnernik nalilersuivoq tassungalu tapiliullugu pikkorissarnerit pitsannorsarnissaat siunertaralugu ineriartortitsinikuulluni. Tamanna pivoq pikkorissarnerni naammassisut, pikkorissarnernik neqerooruteqartut ilinniarfiullu ilinniarfiulertartut peqataatillugit. Tamanna tunngavigalugu isumaqatigiissutigineqarpoq pikkorissarnerit ukiup aappaata affaanik sivilissusilimmik ingerlattarlugit ingerlateqqinneqassasut. Pikkorissarnerit Kalaallit Nunaanni akunnattumik sivilissusilimmik ingerlaqqilluni ilinniarnernut tunngatinneqarpoq. Pikkorissarnerit maannakkutut inersimasunut tunngatinneqassapput. Kalaallit oqaasiinik danskillu oqaasiinik ilinniagassanullu pilersaarutit naleqqussarlugit tiimit amerlineqassapput, aammalu ilinniarnertuunngorniarneq sivikinnerusumik ilinniarfiunerata pineqarnerata pisariaqartitsilerneratigut allanik naleqqussaasoqassaaq.

Ineriartortitsinermut atatillugu pikkorissarnerit neqeroorutigisinnaajumallugit inatsimmi erseqqarissumik pisinnaatitsinissap erseqqissarnissaa naleqquttutut isigineqarpoq.

*2.3 Ilinniartitsisut suliamik ingerlatsinermi piginnaasaat pillugit malittarisassiornissamut piginnaatitsinermik erseqqissaanermi aamma suliamik ingerlatsinissamut minnerpaamik piunasaqaatit ilanngunneqarnissaat*

Ilinniarnertuunngorniarneq pillugu Inatsisartut inatsisaanni § 57, imm. 1-imi aalajangersarneqarnikuuvoq ilinniartitsisut inatsit naapertorlugu ilinniartitsisut ilinniarnertuunngorniarfimmi ilinniartitsissummik ataatsimik arlalinnilluunniit ilinniartitsinissamut piginnaasaqassasut, ilinniartitsinissamullu piginnaasat tassaasut suliamik ingerlatsinermi piginnaasat perorsaanermilu piginnaasat. § 57, imm. 2-mi aalajangersarneqarpoq suliamik ingerlatsinermi perorsaanermilu piginnaasat pillugit Naalakkersuisut annertunerusumik malittarisassiornissaasut, tassunga ilanngullugit inatsimmi tamanna pillugu piunasaqaatit saneqqunneqarnissaannut periarfissat.

§ 58-imi aalajangersarneqarpoq suliamik ingerlatsineri piginnaasat pillugit piumasaqaatit qanoq anguneqarsinnaanersut. Imm. 1-imi aalajangersarneqarpoq suliamik ingerlatsineri piginnaasani universitetimi ilinniartitsissutit qaffasinnerusumi allami kandidatitut soraarummeersimanissaq piumasaqaataasoq, ilinniarnertuunngorniarfimi ilinniartitsissutini ilinniartitsissummi ataatsimi arlalinniluunniit immikkut ilisimasaqalersimanissaq ilanngullugu. Aammattaaq aalajangersarneqarpoq ilinniartitsissutinik marlunnik ataatsimoortitsilluni ilinniagaqarnermi ilinniartitsissutit taakku marluk ilinniarnertuunngorniarfimi ilinniartitsissutaassasut, aammattaaq piumasaqaataavoq ilinniarneq immikkoortuni ataasiakkaani tamakkerlugulu suliamik ingerlatsineri imatut siamatigissasoq atitussuseqarlunilu ilinniartitsisoq ilinniarnertuunngorniarnermi anguniakkanut tunngatillugu ilinniartitsisoq illersorneqarsinnaasumik ilinniartitsisinnaalluni.

§ 58, imm. 2-mi aammattaaq aalajangersarneqarpoq suliamik ingerlatsineri piginnaasat aamma allanik ilinniagaqarluni piginnaasaqalerfiusinnaasut, immaqa tamassuma kingorna inuussutissarsiutini naleqquttumik sulineri suliamik ingerlatsineri piginnaasaqalersimaneq ilanngullugu. Imm. 3-mi aammattaaq aalajangersarneqarpoq ilinniartitsissutinik inuussutissarsiutinut tunngasunik ilinniartitsisut inuussutissarsiornermik misilittagaqassasut. Naggasiullugu imm. 4-mi aalajangersarneqarpoq rektori ilinniartitsissut ilinniarnertuunngorniarfimi atorfinitsinneqarnerannut atatillugu suliamik ingerlatsineri piginnaasaqalersitsissasoq.

§ 57, imm. 2-mut tunngatillugu suli malittarisassiortoqarnikuunngilaq, tamannali pillugu nalunaarutissaq maannakkut suliarineqarpoq. Tamassumunnga atatillugu paasineqarpoq ilinniartitsisup ilinniagaqarneranut suliamik ingerlatsineri minnerpaamik piumasaqaatit pillugit malittarisassiorsinnaanermut pisariaqartitsisoqartoq.

Ilinniartitsisorpassuit ilinniartitsissummi ataatsimi marlunniluunniit kandidatitut nalinginnaasumik soraarummeernikuupput, taakkulu ilinniarnertuunngorniarfimi ilinniartitsinissaq siunertaralugu aaqqissuunneqarnikuusarput, taamaalillunilu inatsimmi minnerpaamik piumasaqaatit malinneqarlutik. Allat allamik siunertaqartumik immaqalu soraarummeernerit immikkoortuinik assigiinngitsunik katitikkamik ilinniagaqarsimasinnaapput, tamassumalu kingorna ilinniarnertuunngorniarfimi ilinniartitsineq misilikkusulersarlugu. Pineqartut kingullit pillugit nalilersuineri ilinniartitsissutini ataasiakkaani suliamik ingerlatsinerimut minnerpaamik piumasaqaatissat kissaatigineqarput.

Tassunga atugassatut § 57, imm. 2-mi pisinnaatitsissummi suliamik ingerlatsinerimut piumasaqaatit minnerpaaffissaannik aalajangersaanissamat pisinnaatitsissutip erseqqissarneqarnera aamma ilanngunneqarpoq.

<b>Inatsisissatut siunnersuut inatsimmut atuuttumut sanilliullugu</b>		
Inatsisitigut maannakut tunngavik	Oqaasertalersuineq maannakut atuuttoq	Inatsisissatut siunnersuut
Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq	Tamanna pillugu aalajangersagaqanngilaq	<p><b>1. § 1</b>-imi imm. 5 aamma 6-tut ikkunneqarpoq:</p> <p>” <i>Imm. 5.</i> ilinniarnertuunngorniartarneq ilinniartitsissutit ataasiakkaat ilinniartitsissutigineqarnissaat neqeroorutigineqarsinnaavoq.</p> <p><i>Imm. 6.</i> Ilinniarnertuunngorniartarneq ilinniartitsissutit ataasiakkaanik ilinniartitsineq pillugu Naalakkersuisut malittarisassiorsinnaapput, tassunga ilanngullugit neqerooruteqartarneq ilinnialernerlu.”</p>
Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq	Tamanna pillugu aalajangersagaqanngilaq	<p><b>2. § 1</b>-p kingorna ikkunneqarpoq:</p> <p>“§ <b>1a.</b> Ilinnialernissamut piareersarluni pikkorissarnernik Kalaallit Nunaanni sivikitsumik akunnattumillu sivilissusilimmik ingerlaqqilluni ilinniarnertut isissutaasinnaasunik Naalakkersuisut pilersitsisinnaapput.</p> <p><i>Imm. 2.</i> Ilinnialernissamut piareersarluni pikkorissarnertut pillugit Naalakkersuisut malittarisassiorsinnaapput, tassunga ilanngullugit neqerooruteqartarneq, inissanik</p>

		aqutsineq, ilinnialersinnaaneq ilinniarnermillu aallartitsineq, aaqqissuussaaneq imarisaalu, nalilersuisarneq uppersaasiernerlu, takkuttussaataaneq peqataavinnerlu il.il., tapersiilluni ingerlatat aningaasalersuinerlu aamma peqataasut akiliutaat.”
Ilinniarnertuunngorniartarneq pillugu Inatsisartut inatsisaat nr. 13, 22. november 2011-meersoq	§ 57, imm. 2: ” Imm. 2. Naalackersuisut ilinniartitsissutitigut perorsaanikkullu piginnaasaqarnissaq erseqqinnerusumik malittarisassaliussavaat, tamatumunnga ilanngullugit §§ 58-59-imi piumasaqaatinik aalajangersarneqartunik sanioqutitsinissamut periarfissat.”	<b>3.</b> § 57, imm. 2 ima oqaasertalerneqarpoq: ” Imm. 2. Suliamik ingerlatsinermi perorsaanermillu piginnaasat pillugit Naalackersuisut annertunerusumik malittarisassiorsinnaapput, tassunga ilanngullugit suliamut ingerlatsinermit minnerpaamik piumasaqaatit pillugit aamma §§ 58-59-imi piumasaqaatinik aalajangersakkanik saneqqutsisinnaanermut periarfissat pillugit.”

### **3. Pisortanut allaffissornermi aningaasatigullu kingunissai**

Siunnersuutip pisortanut allaffissornikkut aningaasatigullu kinguneqarnissaa ilimagineqanngilaq, tassa taamaallaat ilinniagaqalernissamut piareersarluni pikkorissarnerit aamma ilinniartitsissutini ataasiakkaani ilinniartitsinerit pillugit suleriaatsinik aaqqiineq pineqarmat.

### **4. Inuussutissarsiutinut allaffissornermi aningaasatigullu kingunissai**

Siunnersuutip inuussutissarsiutinut allaffissornikkut aningaasatigullu kinguneqarnissaa ilimagineqanngilaq.

### **5. Avatangiisinut pinngortitamullu kingunissai**

Siunnersuutip avatangiisinut pinngortitamullu kinguneqarnissaa ilimagineqanngilaq.

### **6. Innuttaasunut kingunissai**

Siunnersuummi ilinniagaqalernissamut piareersarluni pikkorissarnerit aamma ilinniartitsissutini ataasiakkaani ilinniartitsinerit pillugit neqeroorutit atuuttut ingerlateqqinneqarnissaannut erseqqarissumik piginnaatitsisoqalerpoq.

### 7. Kingunissai pingaarutillit allat

Siunnersuutip allanik pingaarutilinnik kinguneqarnissaa ilimagineqanngilaq.

### 8. Pisortanut kattuffinnullu tusarniaaneq

Inatsisissatut siunnersuut piffissami ulloq 6. december 2013-imiit ulloq 3. januar 2014-imut tusarniutigineqarpoq.

Siunnersuut tusarniaaffinnut ukununnga tusarniutigineqarpoq:

Siulittaasup naalakkersuisoqarfia	Peqqissutsimut Attaveqarnermullu Naalakkersuisoqarfik
Aningaasaqarnermut Nunamullu Namminermut Naalakkersuisoqarfik	Inuussutissarsiornermut, Aatsitassaqarnermut Suliffeqarnermullu Naalakkersuisoqarfik
Ilaqutariinnermut Inatsisinillu Atortitsinerimut Naalakkersuisoqarfik	Aalisarnermut, Piniarnermut Nunalerinermullu Naalakkersuisoqarfik
Ineqarnermut Naalakkersuisoqarfik	Pinngortitamut Avatangiisinullu Naalakkersuisoqarfik
KANUKOKA	Danmarkimi Ilinniartitsinerimut Ministeeriaqarfik
Ilinniagaqartut kattuffii	Meeqqat illersuisuat
Kalaallit Nunaanni Ilinniarfiit	Ilinniarnertuunngorniarniit
Kalaallit Nunaanni Højskolit	Sulisitsisut Peqatigiiffiat (GA)
NUSUKA	SIK
IMAK	ASG (Akademikernes Sammenlutning i Grønland)
Atorfillit Kattuffiat	

Peqqissutsimut Attaveqarnermullu Naalakkersuisoqarfimmit, Aningaasaqarnermut Nunamullu Namminermut Naalakkersuisoqarfimmit, Inuussutissarsiornermut, Aatsitassaqarnermut Suliffeqarnermullu Naalakkersuisoqarfimmit, KANUKOKA-mit – Kommuneqarfik Sermersuumit aamma Qeqqata Kommunianit immikkut oqaaseqaatitalinnik, Nuummi Niunermik Ilinniarfimmit, Qaqortumi Kujataani Ilinniarnertuunngorniarniit, Iisimatusarfimmit, Sulisitsisut Peqatigiiffiannit, ASG-mit, IMAK-imit aamma Meeqqat Inuusuttullu Oqaloqatiginnittarfiannit tusarniaanermut akissutit tiguneqarput.

Tusarnaanermut akissutit siunnersuutip allanngortinnissaanut tunngavissiiingillat, kisiannili siunnersuummut oqaaseqaatini erseqqissaanerit ataasiakkaat nassataralugit.

Tusarniaanermut akissutini qitiuvoq siunnersuummik ilalerineq. Saniatigut tusarniaaffigisat arlallit kissaatiginartippaat qitiusumik ilinniarfiit ilinniarnertuunngorniarnermi ilinniartitsissutinik ataasiakkaanik, ilinniagaqalernissamut piareersarluni pikkorissarnernik aamma ilinniarnertuunngorniarnermi ilassutaasunik pikkorissarnernik neqeroorsinnaalernissaat. Tamatumunnga tunngatillugu oqaatigineqassaaq, nalunaarutinngorlugu ilinniartitsissutit ataasiakkaat ilinniartitsissutigisinnaanerit, ilinniagaqalernissamut piareersarluni pikkorissarnerit aamma ilinniarnertuunngorniarnermi ilassutaasunik pikkorissarnerit pillugit malittarisassanik aalajangersaasoqarsinnaassammat. Allannguutissatut siunnersuutip atuutilerneranut atatillugu tamanna pillugu nalunaarusiortoqarnissaa naatsorsuutigineqarpoq. Tamatumunngalu atatillugu nalilersorneqarumaarpoq qitiusumik ilinniarfiit qanoq annertutigisumik pineqartunik neqeroorsinnaassanersut. Tamatuma nalilernerani, ilaatigut pingaartinneqassapput ilinniarfiit suliassat isumaginnissaannut tunngavigisaat aamma taama pisoqassappat inuiaqatigiit aningaasaqarnerannut ataatsimut isigalugu sunniutaasussat.

Aammattaaq tusarniaanermut akissutit ataasiakkaat oqaaseqaateqarfiginerat oqaaseqaatinut ilanngussaq 1-itut ilanngunneqartoq innersuunneqarpoq.

Inatsisissatut siunnersuutip inatsisilerinikkut misissornerani siunertamut naapertuuttut isigineqarpoq, siunnersuutip kalaallisuaani erseqqissaatit peerneqarnissaat. Tamatumani siunertarineqarpoq inatsisip kalaallisuuata itinerusumik misissorneqarnissaa. Taamaammat naatsorsuutigineqarpoq tamanna pillugu immikkut siunnersuut kingusinnerusukkut saqqummiunneqassasoq.



## **Aalajangersakkanut ataasiakkaanut oqaaseqaatit**

### *§ 1-imut*

Nr. 1-imut (§ 1, imm. 5)

Ilinniarnertuunngorniarfimmi ilinniartitsissutinik ataasiakkaanik (ilinniarnertuunngorniarfimmi ilinniartitsissutinik ataasiakkaanik ilinniartitsinermut) neqerooruteqarsinnaanermut tamassumunngalu malittarisassiorsinnaanermut aalajangersakkami piginnaatitsisoqarpoq.

Ilinniarnertuunngorniarfimmi ilinniartitsissutinik ataasiakkaanik ilinniarnissamik kikkut neqerooruteqarsinnaanerat aalajangersarneqanngilaq. Ilinniarnertuunngorniarfimmi ilinniartitsinermut ilassutitut ilinniarnertuunngorniarfinni tamassuma pinissaa aallaaviusumik ilimagineqarsinnaavoq. Tassani aamma kikkut ilinniartitsinissamik neqerooruteqarsinnaanerannik killiliinissaq ilanngunneqarsinnaavoq.

Nr. 1-imut (§ 1, imm. 6)

Ilimagineqarpoq piginnaatitsinermik aalajangersagaq nalunaarummi piviusunngortinneqassasoq, taannalu allannguutissatut siunnersuutip atuutilersinneqarnera peqatigalugu atuutilersinnaavoq.

Nr. 2-mut (§ 1a imm. 1)

Kalaallit Nunaanni sivikitsumik akunnattumillu sivissusilimmik ingerlaqqilluni ilinniarnarit ilaanni ilinnialissutaasinnaasumik ilinniagaqalernissamut pikkorissarnernik pilersitsinissamut tamakkulu pillugit malittarisassiorsinnaanermut aalajangersakkami piginnaatitsisoqarpoq.

Pikkorissarnerni ilinniarnermik aallartissutaasinnaaneri pikkorissarnarit katiternerisigut, ilinniartitsissutit qaffasissusaasigut, ilinniartitsissutit pinngitsoorani ilinniarneqartussaasersut imaluunniit ilinniartitsissutit nammineq toqqarneqarsinnaanerat ilinniartitsissutinilu ataasiakkaani ilikkagassatut pilersaarutit aqqutigalugit qulakkeerneqassapput.

Ilinniagaqalernissamut piareersarluni pikkorissarnarit maannakkut inersimasunut tunngatinneqarput, ilimagineqarporlu tamanna siunissami aamma atuutissasoq. Anguniakkanulli tunngatillugu tamatigoortuunissaq siunertaavoq, taamaammallu tassani killiinernik aalajangersaasoqanngilaq.

Nr. 2-mut (§ 1a, imm. 2)

Ilimagineqarpoq piginnaatitsinermik aalajangersagaq nalunaarummi piviusunngortinneqassasoq, taannalu allannguutissatut siunnersuutip atuutilersinneqarnera peqatigalugu atuutilersinnaavoq.

Nr. 3-mut (§ 57, imm. 2)

Aalajangersakkami suliamik ingerlatsinermi perorsaanimilu piginnaasat pillugit malittarisassiorsinnaanermut piginnaatitsisoqarpoq, taamaalilluni suliamik ingerlatsinermi minnerpaamik piomasaaqatit pillugit aamma malittarisassiorqarsinnaalluni.

Ilimagineqarpoq suliamik ingerlatsinermit piomasaaqatit minnerpaaffissaat pillugit malittarisassat ECTS-pointinik taaneqartartut (European Credit Transfer and Accumulation System) atorlugit annertussutit minnerpaaffissaasa ilaanni ilinniarnermi ilinniarnermik ingerlatsinerit pillugit piomasaaqatit imaqassasut. ECTS-pointit qaffasinnerusumik ingerlaqqilluni ilinniartit akornanni ilinniarnermi immikkoortut nutaanik naammassisaqarnissamut atorneqartarput. Ukioq ataaseq tassaavoq ECTS-pointit 60-it. Periutsimi ilinniakkat qaffasissusaat allaaserineqanngillat, taamaallaalli ilinniarnert sivilissusaat. Tamanna isumaqarpoq ilinniakkap qaffasissusissaanik takutitsisumik malittarisassiorqartariaqartoq. Ilinniakkanik pingaarnernik pingitsoorani ilinniarneqartussanik, ilinniakkat atitussusaannik, ilinniakkat siamasissusaannik, ilinniartitsinermit periutsinik atuagarsorlunilu ilisimatusarnermik ilinniarnert imassaanik allaaserinninnerit tassani ilaassapput.

*§ 2-mut.*

Siunnersuutigineqarpoq allannguutissatut siunnersuut 1. juni 2014 atuutilissasoq.